

Raj Bhavan Kohima nung Mizoram & Arunachal State Foundation Day mungogo



Dimapur, Tsüklai/February 20 (TYO): Mizoram aser Arunachal Pradesh na state Foundation Day February 20 nü Dr. Imkongliba Ao Hall Raj Bhavan Kohima nung mungogo. Iba sentong nung Angh La Ganesan mejeta jaoker liasü.

Iba sentong nung Nagaland Mizo Community aser Kohima nung aliba Arunachal nungertemi shilem agia liasü. Iba sentong ya Ek Bharat Shrestha Bharat programme kübok ayongzüka agiogo.

Sentong nung o jembiba mapang Angh-i, iba anogo ya kidanger state ana kümtetba anogo dang nungi tali lir, ta ashi. Paisa, iba ya telongjem aser diversity benjungba anogo ka lir

koba asen linük tamendakdak lir, ta ashi.

Angh-i ashiba agi, Ek Bharat Shrestha Bharat nükjidongji linük nung sobaliba balala jangja kümdaktsütsü, akümtsübuttsü aser benjungtsü atema lir.

Kasa mapang nung pai ashiba agi, Mizoram ya sobaliba takar aser kenten nung kanga nungtuguba asüba ajanga jangja meteta lir. Paisa, Arunachal Pradesh ya India nung mezüngbuba anü yalokdak tesem lir, koba kanga dang tebur tajung lir, ta ashi.

Maneni Angh-isa, arrtsü agi bendanger liaka asenok ajak India indang tanüla agi amokbanga lir, ta ashi. Pai, Nagaland ji India aser India ji

Nagaland lir aser kasaji Mizoram aser Arunachal Pradesh nata lir ta ashi.

Sentong nung Lalthara, Rtd IAS aser taoba Nagaland Chief Secretary shiba Nagaland Mizo Welfare Association tir lir, pai state ana tenüng nung iba sentong tajung ayongzüka katsüba atema Angh dang kanga pelaba lemsatepa liasü. Paisa, Mizo nung aser state indang puti otsü tatsü agi lemsatepa liasü.

Maneni sentong nung Mizoram aser Arunachal Pradesh Angh nati lemsatepa video osang saya liasü aser sobaliba sentong balala saya liasü. Anghisa sentong nung shilem agirtem nem tetushi agüja liasü.

Mokokchung nung coaching centre 'shisalen riju' ta sür ka lapokogo



RD & SIRD Minister, Metsübo jamir-i Feb 19 nü Mokokchung nung 'Shisalen Riju' ta sür coaching centre ka lapoktsüba mapang tangokba noksa nung angur. Mokokchung, 19th February, 2024

Mokokchung, Feb. 20 (TYO): Mokokchung asoshi tapak tasen ka asütsüsa tanü "Shisalen Riju" ta sür NPSC aser NSSB tatidang agütsütsü jangrartem nem angati tesayuba agütsütsü asoshi 'coaching centre' ka Feb 19 nü Nagaland RD & SIRD Minister, Metsübo Jamir-i lapoktsüogor. Tsüsapang Baptist Arogo Pastor, Rev. W. Süpongi iba riju meshitetsü.

Tetushi tesemdanger Metsübo Jamir-i iba riju lapokja jembidang, Advisor & DPDB Chairman, Tongpang Ozüküm lenisüba nung iba mapatong asangsang kümdaktsüba den shirnokisa iba mapatong dak sentakba nung nungita aser yaritepa arudar, parnok ajak dang pelaba metetdaksü.

Riju ka lapoka nisungi nisung ka taküm jenjang yanglushitsüba mapa temelabo masü. Coaching ji kanga tongtibang lir, ibai tanga maparen ka ama masü, anungji, coaching agirtem dang masü saka tesayurtema sakuku bendanga agütsütsü nungdaker, aji mesüra bilemba ama süngjang metangtetsü, ta pai ashi.

Coaching taginür ajak

agütsüba masü saka shirnok temulungtetba tulu nung arur parnok nemji maangka agütsütsüla, aji mesüra iba coaching centre tenzüka nükjidong metongtetsü, anungji, coaching agir shiai aser tesayurtemi ibaji süoki ia agütsüla, ta paisa ajungshi.

Takom anguba – mangubajia tongtibang lir, saka item dak alaka nisung ka taküm koma libalirua aor ibaji tongtibangba aser iba education-ji agütsütsüla, aji oda, tesayurtemi kanga kümdanga aser shisa ka-a sayutsü asoshi paisa ayongzü.

Coaching centre-tem ya nükjidong balala nung lapoker, asenoka koba nükjidong atema iba riju lapok, ibaji kanga junga angatetsüla. NSSB, NPSC, UPSC tatidangtem ya yimya balala nung agir, anungji, itemji bendanga aser tensa den apet tawa tanü atalokbatem sayutsü asoshi paisa shisem.

Government mapa tazüng ka adokdang private sector nungbo mapa noklang tama adoker, anungji, itemjia mamatoki tangatetba agütsütsü asoshi paisa ayongzüka liasü.

Iba riju ya Mokokchung district planning and

development board (DPDB)-i 'LADP Common Pool' nungi achayanga anepaluba mapatong ka lir. Iba riju ya Mokokchung yim kübok Tsüsapang Sector nung taoba mapang Baptist English School aliba tesem nungto amenoka lir. Mokokchung yim putu menden den angatetepa Ao Baptist Arogo Mungdang (ABAM) dang temelaba agir iba riju ya lapokba lir. Iba riju nung tongtibangsa competitive exam balala atema tesayubatem agütsütsü.

Sentong nung Advisor & DPDB Chairman - Tongpang Ozüküm, Shisalen Riju Management Committee züngsem & FAC nung tesayur - P. Tiatemsü, ADC & Convenor, Shisalen Riju Management Committee - Chumlamö Humtsoe, Mokokchung Village Council Chairman, ABAM executive secretary - Rev. Dr. Mar Pongener aser Mokokchung DFO - Dr. Sentitula (IFS) parnokisa shilem balala agia liasü. Tanü iba sentong nung Advisor Imkong L. Imchen aser Advisor T.N Manen na densema liasü.

Mkg. nung GB Association hall ki lapok

Mokokchung, February/ Tsüklai 20 (TYO): Mokokchung District GaonBura Association(MDGBA) Hall tanu Nagaland, Advisor Water Resources Wb.Tongpang Ozüküm-i lapoktsüogor.

British nung yimsüsüba mapang nung GB-temji parnok yimsüsüba nung tongtired ka ama liasü aser osangtsüsang agütsü asoshi temelung lemteta shimba ama GB-temi tanu tashi nung yimsüsüba mapatong ajak nung kanga dang takok ngua inyakdagita Advisor Tongpang Ozüküm-i ki lapokba sentong nung jembidang ashi.

Sorkari nenok GB-tem nem uniform agütsür aser ibaji ajanga nüburtem asoshi GB-tem khuret tulu lirta metetdaksür, uniform asema tetezü angateta inyaktüla aser libalirotsüla, kechiaser GB-temji sorkari shimba agi inyakba dang masü saka GB-temji nübur aser sorkar na asoshi otongdar lirta Tongpang Ozüküm-isa Mokokchung GB-tem ayongzüka jembiba.

Tanu lapokba ki nungya GB-temi kanga dang shisa kaa telemtetba agia nüburtem aniangta Mokokchung district nung aliba GB-tem ajungshia ashi.

Sentong nungsa Mokokchung Deputy Commissioner Thsüvisie Phoji-i jembidang GB ta asüba ya kanga dang jenjang aketba mapa ka lir, alima ajungai British nung yimli nungbo anü mairta jembiba mapang aser parnok yimli merenba mapang parnok yimli dak tamang tulu katetba ama tanu putu nunga GB-temi alima meima inyaktü mangdang lidaktsünerta ajungshia ashi.

Naga lima nung yimjung akaba didict-ji Mokokchung dang lir, kechiba süra Naga nung tanga kintem ajak nung ali ken o ama aser meputep agi



Mokokchung District GaonBura Association Hall lapokba sentong nung Nagaland, Advisor Water Resources Wb.Tongpang Ozüküm-i jembidang tangokba noksa

sünga lir, süra Naga nung ken o alibatemi nenok khuret süa yimjung mapa inyakangta Mkg. DC-isa GB-tem ayongzü.

Mkg. DC Thsüvisie Phoji-isa British nungeri nenok dak temelung lema nübur anitsü nungloktüba ama nenok GB-temi pei aliba ward aser yimtsüngtem nung sorkar nungi osang aruba lemsaba aser yimsüsür senden nung shilem agiba kisüng masü saka nenok tashi amshia koba tashi inyakdar ibaji shisadangtsü kanga dang tongtipang lirta ashi.

Kasa sentong nung MDGBA Tir Wb.Along Jamir-i tepela o jembiba aser ali kibur tenung nung Kichu kidong Mokokchung yim nungi jembiba aser MTBA Pastor Rev.Chuba-i ki meshiteta sarasademba den MDGBA Tongti Zülur Imlitemsü ketdangtsüba nung iba sentong agi. MDGBA ki ya sen 4120980 indoka asü aser iba ya Mokokchung Town Hall aser Ao Senden ki anasa lir. Tanu iba sentong nung tsükong ajak nung aser yimtsüng aser Town Ward-tem nungi GB-tem longso longsoa aruagi aden.

Chief Minister Rio-i Sekrenye benjung maotsütsü



Dimapur, Tsüklai/February 20 (TYO): Nagaland Chief Minister Neiphiu Rio-i, February 24 nü State Stadium, Dimapur nung Angami Public Organisation-i ayongzüka Angami nung benjung, Sekrenye cum Mini Hornbill festival maotsütsü.

Mongolbarnü osangbenntem den sensaksemba mapang APO tir aser Convenor Planning Committee Razouvotuo Chatsui, iba benjung ya sobaliba wazüka ayutsü aser ajungkettsü nükjidong nung ayongzüka amunger ta ashi.

APO-i kin 16 nungi lenirtem jaokogo aser iba den kidanger state Assam nungi Karbi aser

Ahom nungertem iba benjung nung shilem agütsü atema jaokogo. Iba benjung nung nisung 15,000 dak temai shilem agütsü imlar. Taküm iba benjung ya tzükong pezü nungi frontal organization tem den longjemer ayongzüogor.

Benjung nung Deputy Chief Ministers Y Patton aser TR Zeliang na tetushi tejaoker asütsü aser Minister, PHED & Cooperation, N. Jacob Zhimomi, Advisor for Tribal Affairs and Election H. Tovihoto Ayemi aser Advisor for Labour, Employment & Skill Development and Excise Moatoshi Longkumer nung alakteta jaokertem asütsü.

My Handloom. My Pride
Do visit us at the

State HANDLOOM EXPO (SHE)
HATHKARGHA MELA
Under Aatm Nirbhar Bharat Utsav

10:30 AM to 5:00 PM
16th-29th February 2024

At Urban Haat, Dimapur, Nagaland.
Participants from various State of India
Along With Other Special Attractions.....

THE MUSICAL EXTRAVAGANZA
Presenting Popular Local Artists
On **24th FEBRUARY 2024**
From **4:30 P.M. Onwards**

Delicious Food Court available every evening

ORGANISED BY: Nagaland Handloom & Handicrafts Development Corporation LTD, Half Nagerman, Dimapur, Nagaland
SPONSORED BY: Office of the Development Commissioner for Handlooms, Ministry of Textiles, Govt. of India, New Delhi

PM-i Jammu nung sen cr. 30,500 indang project aika semzüksü



February 20, 2024 nü Jammu nung terenlok project balala semzüksüba aser project tasen atema lung azüngtsüba sentong nung Ato kilonser Narendra Modi, Union Minister Jitendra Singh aser Jammu & Kashmir Lt. Governor Manoj Sinha nunger tangokba noksa nung angur.

Jammu, February 20 NDA nem menden 400 nung (Agencies): Mongolbarnü takok ngudakjang ta mepishir," Jammu nung Ato kilonser ta pai ashi.

Narendra Modi-i sen crore 30,500 indang terenlok project aika tenzüksüogoo. Shisaliok, railway, tayimtsü aser gari lenmang dak sendakba project aika semzüksüba aser project tasen tenzüksüba sentong nung jembidang Modi-i, BJP sorkari Arrla 370 agientsüogoo; iba Arrla ya Jammu & Kashmir nung terenlok atema tetsükdaktsü tuluka liasü, ta ashi.

"Arrla 370 agienba ajanga ni nüburtem dang taruba election nung BJP nem menden 370 aser

Chandigarh Mayor election nung Kuldeep Kumar-i takok angu

Chandigarh, Tsüklai/February 20 (Agencies): Mongolbarnü Supreme Court-i Chandigarh Mayor election indang ballot papers reprangshiba sülen iba election nung takok angurji Aam Aadmi Party (AAP) candidate Kuldeep Kumar lir, ta sangdongogo.

Iba election nung Presiding officer, Anil Masih-i SC dang pai ballot raksaja liasü, ta nangzük. SC-i vote tanaben züngshiang aser vote 8 'magila' kümja alibaji agitsü, ta metetdakja liasü. Supreme Court-i, ashishiba ballot 8 pronglaji AAP Mayor candidate Kuldeep Kumar nem agütsüba vote liasü, ta metetdaktsü.

Chief Justice DY Chandrachud, Justice JB Pardiwala aser justice Manoj Misra nungeri akümba Supreme Court bench-i Hombarnü Registrar general of Punjab & Haryana High Court dang election agiba record ji judicial officer ka ajanga New Delhi-i bener yokang aser Mongolbar nikongdang Supreme Court nem agüjang, ta tuyua liasü.

Supreme Court-isa returning officer Anil Masih-i tim mesüi inyakba atema pa anema ken o akatsü tuyuogo. Hombarnü Masih-i Supreme Court dang pai ballot 8 raksatsüba nangzuka liasü, koba ajanga BJP candidate-i takok ngua liasü. Supreme Court-i, "Presiding

officer-i metetsümonga ballot paper 8 ji raksatsü ama reprangteter," ta metetdaktsü. Mongolbarnü Supreme Court-i ballot papers 8 denji külemi Chandigarh mayor election agiba sülen vote azüngba video reprangshiba sülen, vote 8 jia züngsemtsü, ta metetdaktsü. Taküm January 30 nü agiba Mayor election nungji ballot 8 ji mezüngsemba ajanga BJP candidate Manoj Sonkar-i takok ngua liasü.

Supreme Court-isa, Chandigarh Mayor election nung presiding officer, Anil Masih-i election inyakyim nung aibelenogo, anungji pa anema ken o akatsüla, ta metetdaktsü. Tamalen election osang sangdongba sülen Kuldeep Kumar densema Aam Aadmi Party aser Congress-i Supreme Court nem temepishiba ken o ka agüja liasü. Mezüng iba ken o angadanga mapang nung SC-i, linük nung democracy tepsettsü atema court-i memelatsü, ta metetdakja liasü. Chief Justice, DY Chandrachud-i, "Returning officer-i inyakba mapa ya democracy tepsetba lir. Pai camera nung repranger ballot paper raksabaji video nung jangjangja angur. Pai election yamai ketdangsia agir na?. Iba ya democracy ashioksüba lir. Iba nisungba anema ken o akatsüla," ta jembia liasü.



Bastar, February 20, 2024: Income Tax department-i Congress lenir kar meyong bank account shibangtsüba anema Mongolbarnü Bastar district nung Congress party nung inyakertemi Centre sorkar anema longkak aitdang tangokba noksa nung angur.

JP Nadda aser Sonia Gandhi na densema aika RS nung shimogoo

New Delhi, February 20 (Agencies): Gujarat nung Rajya Sabha menden pezü atema election nung BJP Tir JP Nadda densema BJP candidate tem den tetokteper malibayong par pezüprongla Rajya Sabha nung züngsem shimba sangdongogo.

BJP nungi tanüngba candidate asemji Govindbhai Dholakia, Jasvantsinh Parmar aser Mayank Nayak nunger lir. BJP nungi par pezüi nomination paper file süa liasü saka par pezü den tetokteper candidate shinga maliasü. Gujarat assembly nung BJP züngsem 111 lir aser Congress züngsem 65 lir. Ano külen Rajasthan nunga Rajya Sabha election nung Congress lenir Sonia Gandhi, BJP candidate Chunnihal Garasiya aser BJP candidate Madan Rathore nunger den tetokteper shinga malibayong par asemprongla shimogoo, ta Assembly Secretary Mahaveer Prasad Sharma-i ashi. (Maneni tapak 8 nung...)

Maharashtra Assembly nung Maratha Quota Bill agizükogoo

Mumbai, Tsüklai/February 20 (Agencies): Maharashtra state nung Maratha nungertemi mapang talangka nungi sorkar dang akhangba ama tatemsa Mongolbarnü Maharashtra Assembly nung Maratha Reservation Bill agizükogoo. Iba ozüng agizükba ajanga Maratha nunger nem shisaliok rejutem aser sorkar mapa nung menden shilem 10 wazüka yutsütsü.

Mongolbar anepdang Maharashtra Chief Minister Eknath Shinde-i aniba Cabinet-i Maratha reservation indang draft bill agizükba liasü. State sorkari agizükba sülen kodang iba bill ya ozüng kümdir Maratha nungertemi shisaliok aser sorkar mapa nung maongka angutsü. Tang Maharashtra nung Economically Weaker Section (EWS) nem-a shisaliok rejuatem aser sorkar mapa nung menden shilem 10 wazüka yuja lir, aser iba reservation nung tajangzük angurtemji teimbaka Maratha nungersa lir, kechiyong iba reservation ajanga tajangzük angur shilem 85 bo Maratha nunger lir. Maratha quota ya Socially and Educationally Backward Classes Act, 2018 den kasa lir; taoba mapang chief minister Devendra Fadnavis-i aniba sorkari iba quota ya benoka liasü. Mongolbarnü Maharashtra sorkari assembly senden temeja ka ayongzükba iba bill benoka o lemtepbpa sülen voice vote ajanga iba bill agizük. Maratha quota temeden akhanger lenir, Manoj Jarange Patil-i Jalna district kübok Antarwali Saarati yimdak lumia longkak aitba agi sorkari iba bill benoktsü telemtetba agia liasü. Taoba Hokolbarnü Maharashtra State Backward Class Commission-i Marahta nunger loktiliba aser shisaliok nung tesülen atsüngzükba aliba report ka sorkar nem agüja liasü. Iba commission yagi anogo 9 tsüngda kibong crore 2.5 shi survey agiba sülen parnoki sorkar dang Maratha nunger nem shisaliok rejutem aser sorkar mapa nung menden shilem 10 wazüka yutsütsüla, ta benoka liasü.



TIR YIMYIM YIMOBILEM (EDITORIAL)

DIMAPUR RASEMNÜ, FEBRUARY (TSÜKLAI) 21, 2024

Oshi aika metettsüla

Tanü ya alima ajunga nung tetsü oshi anogomung lir. Ibai akhidang 1947 nungi East Bengal ta jaa arur ano 1955 kum nungibo East Pakistan ta jaa aruba tangbo Bangladesh ta ajaba lima nung parnok tetsü oshi, Bangla oshi dang Bangladesh nungbo yimten nungdak ajak asoshi amshitsüla ta kaketshirtemi 1952 kum longkak aita nokdakba anogo, February 21 nung police-temi kaketshirtem pezü khasetba nungi tenzükba anogomung ka lir. Atangji, tetsü oshi ya kanga tongtimbang ta angateta alima ajunga nung iba anogomung amongtsü asoshibo 1999 kum-ang November ita nung United Nations Educational, Scientific and Cultural Organisation (UNESCO) lokti mungdang nung "International Mother Language Day" amungtsü ya sangdong aser iba sülenji UN lokti sendenia aji agizüka kum shia tanü anogo ya alima ajunga nung tetsü oshi anogomung amunger. Taküm iba anogomung omen ya Oshi aika metetbaji putu ka nungi ka angazüktepa aotsüba tongshi lir ta shimteta lir. Atangji, tanü tetsü oshi mesamadaktsüi tajungba renloka oa jembitsü asoshi kanga süoki ia jembiba putu ka nung, akok tashi oshi aika angazüktsü merangtsüla ta ajungshitsübaji kanga tapet aser tongtimbang omen ka shimtetogo. Asenoki aiben tetsü oshi angazüktsü, jembitsü, azüngtsü aser zülutsü ajungshiba ya tangar oshi ajak toktsür tetsü oshi nung dang temulung agüjang ta jembir amai angateter. Ano külen asen lima ajangerbo asen tetsü oshi jembir majurur, anungji nungdak madoker ta bilemer. Ibaji dang masü saka asenok ama alima nung kin tila purtem ya teküpbok tia nung aliba purtem lir, anungji asenok ya tangar tsüngdang mera maket amai asenoksasa bilemer, anungji asen tetsü oshi jembibaji mashimalu nisung amai asenoksasa asenoki bilemloker. Aji oda, tangar tashitemeteter oshi, English ama jembir nung dang asenoka terabo tashitemeteter amai nümadanga bilemba shisatsü ka asenok dak alir. Aji tim dang, kechiyong tangar tashitemeteter oshi ka ashibaji atamata masü, yangji tashi tuluka lir aser aji takoka tulu lir. Ajisüaka, tangar bendanger tashitemeteter oshi angazüka jembir dang, pei tetsü oshi mejembitetra, ibajibo tangar takar tular kidang oa anisüngzüka alitsü jenjang tajung ka angu nung, pei tetsü tasola amadokba den kasa asütsü. Asenok koba ama tashitemeteter kümdir kumang aser komaka kadir kaang, asen tsüraburi dang asen jakzükba, asen kin kidong, asen libalirua aruba, asen sobaliba, asen kinunger adianutem aser asen yimtsür yimertem indang jungjunga shitettsü. Itemji asen taküm tamendakdak aser asen taküm otsü lir. Asenok taküm otsü aser sobaliba ya ajungbenaka English mesüra Hindi shia akümba nungi metenzüktsü, ajisüaka asen tetsü oshi nungi dang item ajakji shia tenzüktsü. Ibayongji, tanü, talisa, kaketshirtem tangar oshi nung tashitemeteter akümtsü merangtepdang, oshiji ka dang angazüktsü aser ashitsü memerangi bendanger oshi denji pei tetsü oshi den oshi anabo mesüra asem nungbo kibur küma ashitsü merangtsüla. Iba jagi dang alima nung putu ka nungi ka ta melentepa aodang asenoki asenok chirnurtem dang aser chirnurtemi parnok chirnurtem dang asen tsürabur lipoklisang, sobaliba aser lia aruba otsütem angazükdaktsütettsü. Atangji, item ya ataloktsü atema asenok ajaki pei kidang nungi pei tetsü oshi jembir tenzüktsüla.

OLEMSABANG

AJEMALUBA: AJEMASÜNG

- Dr. Imliwati Longkumer (SOURCE: MANA)

Osep nung Ajemaluba tetezüji "Tesüngjem, anebalu aser temeimnü jakla" ta angutsü. Tanela süngjang tsütsülen nungi ajemasüng ya Tsüngrem nem tenüngsang agütsüba, tangar dang aria bilema awashi tajung sayutetba ta angateter. Ibai mang ayangtsü mejangraba, pei atema mebilemba aser ain madokba jakla den sendaktepa lir.

Ajemasüng ya Tanela sempet lir. Ibai temulungsentsü temerük agi Yisu Khrista den sendaktepa aliba ajanga angur. Au, ibai Tanela sempet lir, saka ibai asen dak alitsü asoshi aseni inyaktsü kar lir. Timtem aser toudhi mapang nung ajak den aremzüka aser ajemalua litetba ajanga ajemasüng jakla asen dak adokdaktsür. Gal. 5:22-23 nung agüja aliba tanga Tanela süngjangtem den iba Tanela süngjang ajemasüng ya sendaktepa lir. Yisui iba sempet ya ajemaluba sempet den sentaktepa sayua lir. (Mt. 11:29). Iba sempet ya ano tila akümba dena sendaktepa lir, saka aji tashi mait makokba ajanga tila akümba tsütsülen masü, saka odang asa-a tila akümba lir. Paul-i ashi ama ibai pei sasa pei tashi, pei taküm azüoktetba nungi adoker (2 Kor. 10:1). Tanelai ajungshiba ama asenok kati ka den meimtepa aser azüzüktepa alitsü Paul-i asenok ajungshir. Ibaji Yisu aser Pa nütsüngtem tesayuba lir. Kodang asenok asen adianu aser temeimteper den lidir ajemasünga alitsüji tezüba lir, saka aseni memetetba purtem aser shirnoki asen anema inyaker, item purtem den ajemasünga alitsü tasak lir. Iba mapang ya aikati ajemasüng aser tashi mait na mebendangteti bilemer. Asenoki aiben tangar dang tashi mait mesayuner aser ibaji ajanga ajemasüng jakla lir ta asenoki amadoker. Tangar timtem toudhi nung ngua parnok yaritsü mulungsoa aodang parnok mashi angateta bilemstü ama aseni bilemer. Saka yamaji inyakba ajanga asen dak aliba Tanela sempet ajemasüngji tali jangjar. Iba ama mapa inyaktsü asoshi Tsüngremi asenok aja aser sempetji agütsü. Ajemasüng jakla ajanga asenok tsürabur tajung aser tanur tajung, kiyonger tajung aser tembar tajung kümteter.

Ni kodaser tangar dang ajemasüng jakla sayutettsü?

Kodang ajemasüngji asen libaliro nung amshidir kechi ama asütsü? Ashitsü agi iba ya oda temeim, teyaritep, taochi aser aria bilemba jakla lir. Yangi ano tanga lenmang kar tuyudi.

- * Ajemasüng jakla agi kecha atsüayong makai pei dang pi taoba ta züngshir.
- * Iba jakla ya agi tangar shirnoki aseni bilemba aser aginüba ama bilema meinyaker parnok mesembar mesüra mesendoker saka aremzüka atar.
- * Ajemasüng jakla jagi nisung ajak temenen nisung aser tashi mait mokokmin agi sünga lir ta agizükteter (Rom. 3: 23)
- * Ajemasüng jakla jagi temeimtsü maket oda teraksa aika agi sünga aliba nisung dang taochi sayutsü jangrar.
- * Ajemasüng jakla jagi rara osü aser ain adoka kodanga mejembir, saka teti O tanep aser tanük jembir (A. Shin 15: 1)

Kodaser ajemasüng asen dak züsentettsü?

- * Timtem aser tako agi sünga alib alima ka nung na tesüneptsür ka asü? Ne ajemasüng jakla amshitettsüsa timtem aser toudhi aliba tesem kati ni yokang ta Tsüngrem dang sarasademang. Kodang Yisu Khrista iba limai shina aliba Messiah ama aru, Yihuda nungertemi Pa magizüktet. Kechiyong parnok Pa ajemalua Gadu nung mener arutsü meimla. Saka tamaren yimsüsür ka ama arua Yihuda nung nem nüchiso agütsütsü ta imla-a liasü. Messiah nükjidong tuluji Yihuda nungeri mangatet.
- * Aji oda Yisui ochiji kodanga sota mayu, saka Pai alima nem teraksa masü taküm agütsü. Kodang asenoki O tanük aser ajemasüng yimya sayudir, asenoki alima dang ajemasüngba Yisu kuli asür (A. Shin 15:4). Ain adokba aser tashiyim agi sünga aliba lima ka asoshi ne ajemasüng jaklaji taneptsü mozü tajungtiba asütsü.

Tanela sempet ajemasüng yagi asenok dak nungi akhangba aika lir. Iba yagi aseno kong lidir liaka alima tensa mapang ajak nung Tsüngrem mezüngbuba, tangar tanabuba aser asen tesüsabuba asütsü akhanger. Iba ama angateta lia aotsüji asenok asoshi temelabo masü. Temeim, taremzü, ajemalu aser aria bilemba sempettem makara ibai meinyaktettsü. Saka osang tajungji Tsüngremi asenok dang lenmang sayua lir. Tsüngrem O ji asen tetsüng asoshi milen aser asen lenmang asoshi tesangwa (T.Ken 119:105). Aseni mamshitettsüsa Tanela Temeshi Tsüngremi Pa sempet asenok nem kodang magütsür.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agütsü mepishir

Yaküm Iran linük nung sorkar ketdangsertemi Khristan 166 apu



Tehran nung aliba Saint Targmanchats Armenian Arogo Tenla kidang Iran nungger Khristantem tekülem sentong agidang tangokba noksa nung angur.

February 20, 2024: 2023 küm nunga Iran nung ketdangsertemi Khristantem anema inyakogo; talisa ketdangsertemi Laishiba alemertem mita ao, ta Khristan melungtet telok kari külem osang ka ajanga metetdaksü.

Yaküm Iran nung apuba Khristantem shilem asemsü nungi kabo Laishiba bena aliba agi apuba liasü, ta parnokki metetdaksü.

Khristan melungtet telok kar- Christian Solidarity Worldwide, Open Doors, Article 18 aser Middle East Concern-i senteper '2024 joint annual report' sangdong.

'Faceless Victims: Rights Violations Against Christians in Iran' ta ajaba report nungji Iran sorkari Khristantem densema nütsüng ajema aliba nüburttem anema inyakba, apuba, senchi achiba, tepuokdak ayuba aser lisü agi arepba osangtem tejangja metetdakja lir.

"Tesüiba kümtem medemdangra 2022 küm Khristan 134 apu saka 2023 küm nungbo Khristan 166 apu," ta iba report ajanga metetdaksü.

Yaküm June ita matongdang sorkar ketdangsertemi Khristan ishika apu saka iba sülen ita asem tsüngda Khristan 100 dak tema apu; tesüsa Khristmas mapang nunga Khristan aika apu.

"2023 küm tatembanglen tashi nungbo Khristan 17 shi ita asem nungi küm pongu tashi tepuokdak ayutsü obendang agütsü; kar dang senchi achi, kar dak lisü agi arep aser Khristan kabo leper tudaktsütsü temerenshi agütsü," ta kasa report ajanga metetdaksü.

Article 18 nung news director, Steve Dew-Jones-i, 2023 küm Khristantem aika

Mahsa Amini asüba anogomong matong tsüngda apubaji odangbo masü, ta ashi. Dew-Jones-isa, tawa chiokba Khristantem dang longkak aitba sentong nung shilem magütsü tuyuogo, ta metetdaksü.

Iran nungbo Islam yimsü toktsür Khristan yimsü agizükbaji ozüing alema lir, aser kar danga house church nung züngsem kümra parnokki linük security anema inyakogo, ta tai tonglokja küm aika tepuokdak ayur, ta Open Doors' World Watch List report ajanga metetdaksü.

Akhidang nungi Khristantem- Armenia mesüra Assyria nungger Khristantembo agizükteter, ajisüaka parnokki "second-class" sensotem ama züngshir, ajisüaka Islam yimsü toktsür Khristan yimsü agizükertembo kanga reshikangshir.

Iran nung Farsi oshi nung adokba Laishiba azüngtsü memelar mesüra Islam yimsü toktsür Khristan yimsü agizükertem mezüngshir aser kinüngertemia sendoker.

Dew-Jones-i, Iran nung talisa Laishiba alemertem anema inyaker; yaküm apuba Khristantem shilem asemsü nungi shilem kabo Laishiba ka dak tali bena alirtem liasü, ta metetdaksü.

Tenük kuli alir Khristan kati, mapang shia intelligence agent kati par ki mita repranger, ta ashi.

"Ano karibo online ajanga Khristantem inyaksangshi ajak mita repranger. Court nung ken o angadanga mapang nung ketdangsertemi Khristantem meyong emails menüngzüker court dang kuli sayur," ta paisa metetdaksü.

Christian Solidarity Worldwide, Open Doors, Article 18 aser Middle East Concern-i Iran sorkar danga

tamangba yimsü dak sendakba nung pua alir Khristantem ajak tangsa chioktsüla, ta takhangba agütsüogo.

1979 küm Iran linük nung Islamic Revolution matalokdang Islam yimsü toktsür Khristan yimsü agizükertem noklang ishika dang liasü. Tanü tashi iba linük nung Khristantem anema inyakyonga Khristan nütsüng kanga renlokdar.

Islamic revolution ajanga secular yimli atsüngdokba sülenbo Khristan nütsüng ishikaji-a samadoktsü aser Islamic Republic of Iran nung Sharia ozüing ajanga Khristantem kanga reshikangshitsü, ta bilema liasü.

Tesüiba küm 44 tsüngda Iran linük nung Islam yimsü toktsür Khristan yimsü agizükertem kanga reshikangshia arudar. Iba linük nung Farsi oshi nung Laishiba khenyongi memelar aser tangar den Khristan yimsü lemsatepbaji ozüing alema lir.

Islamic revolution sülen Tsüngremi Armenian, Chaldean aser Assyrian Arogotem amshiba ajanga Iran nung Khristan nütsüng kanga züiner.

Iran nung Armenian, Chaldean aser Assyrian nungger Khristan nütsüng kanga ajema 100,000 shi dang kümogo, ajisüaka Islam yimsü toktsür Khristan yimsü agizükertembo iba dang nungjagi terben agi teimba kümogo.

House churches, online media gospel programs aser nisungtem tsüngda Khrista osangtajung lemsatepba ajanga linük tesem ajaklen Khristan nütsüng renloker.

Reshikangshi ajanga Iran nung Khristan yimsü samatsüsa liasü ajisüaka mamangteti Arogo ang kanga keraa ainer.

ANOGO ABEN TSÜNGREM DEN

Kecha asoshi shisatebulu

Kecha nunga temulung tatemala saka ajak nung sarasademba aser mepishiba aser tenüngsang agi nenoki meshiba Tsüngrem nem metetdakjang.

Filipi 4:6

Temulung tatem! Tsüngrem chir ka kecha agia temulung atema mekümdaktsütet ta Pauli ashi. Shisabuludaktsüba mapa mita liasü. Par kin bendanger armyi agir tashir tamajungi yimsü süa liasü. Pa tiyazü kuli ajanga taittsüba agütsür tepuokdak nung alidang zülu. Pai meimbatem nungi pa pilar liasü, pa tebilembatem asüngdang aser mashilen angatet. Kari pai arogotem tenzüka takok ngua inyakba maginü. Pa temang timatem aser teti rishikangshi ajuru (2 Kor. 11:23-29). Aji saka Pauli ashi, Tsüngremi yimjung magütsütettsüsa idakji timtem kecha mali!

Tsüngremi ne timtem agientsü menüngdak saka Pai khuji na asoshi abentsü. Pai nai Pa tesünep metetdaksüner, koba meimchiri angatettsü makok. Tia kar nung Tsüngremi ne nem agütsüba tesünep/yimjung Tsüngremi koda agütsü nai ajungajibo mangatettsü saka ibaji ajurutsü asoshi nai angatettsü menüngdak. Iba tesünep ya shirnoki junga bushir parnok atema dang masü, ibai ajak atema lir!

Tsüngremi na yimjung nung lidaktsüner ta metettsü akok, saka tang nai kechi ajurur ibai ya koda takoktsü ta süngmangtsü akok. Aji saka Laishibai kecha nung temulung tatem. Tsüngrem tsüngdang kecha tamakoktsü, tetsübuttsü, timtem mali ta tejangja ashir. Kechi shisabulu südir süang Tsüngrem yimjung tesünepi ne mulungjang nüka lidakjang.

Uganda nung Muslim nungertemi Khristan yimsü agizüker apuani tepset

Nairobi (Kenya), February 20, 2024: Uganda nung Islam yimsü toktsür Khristan yimsü agizüker apuani na tepseta ajanga tanur pezü lajar kümogo.

Kinüngtsü o kinüngbu na jagi ita ana tejakalen Islam yimsü toktsür Khristan yimsü agizükba sülen February 2 nü Muslim nungertemi tena tepset. Kibuku District kübok Bulalaka yimyak arrshi küm 38, Twaha Namwoyo aser pa kinüngtsü Nadiimu Katooko (27) nati Islam yimsü toktsüba agi tena tepset, ta kiyonger kati metetdaksü.

Osangbener den jembidang kiyonger kati, "Ni nisung kar Arabic aser Lugwere oshi agi jembiba angashi. Twaha-i Islam yimsü toktsüba atema pai taa angutsü, ta parnok tsüngda jembiba ni angashi. Mapang tatsüka dang lirbo nisung kar asaba ola ni angashi," ta metetdaksü.

Kibuku central police station nungi police kar arudang Twaha Namwoyo'er kima

kinüngtsü tena tasü mangji angu aser ki telung nungji par tanur pezü (arrshi küm 7, 5, 3 aser 2) liasü.

Iba tatalokbaji aonung asüba agi kiyongertemi nisung tepsetertem maitsüji mejangja. Twaha aser pa kinüngtsü nati Nampido yimyak aliba Christian center ka nung Khristan yimsü agizüka liasü.

Twaha'er medemer kati, "Ni ita trok tashi Twaha Namwoyo'er kibong semdanga sarasadem agia aruba sülen tesüsa yaküm December 5 nü tenati Khrista agizüka liasü. Ni tena dang maneni Khristan tesayuba lemsatepa aru, ajisüaka ni tena dang nenati yimsü tasen agizükbaji tangar nem memetdaksütsüla, ta tekümdangtsü lemsateper liasü," ta metetdaksü.

Uganda linük temzüng aser tanga ozüingtem ajanga senso ajak nem yimsü temeden agüja lir, ajisüaka anüdoklen Uganda nungbo mapang shia Islam yimsü alia amangertemi Khristantem anema inyaker.

AO OSHI ANGAZÜKDAK:
TANÜ ANGAZÜKTSÜBA OJANG



Sola

(v) o nung temo keta jembiba (oily tongue)

* Asanglai o kanga solaa jembir.

Solem

(v) tonglem (reheat food)

* Tanurtem anüngdang aon tonglemer chiyongdaksü.

OLONG PAITEP # 6704

1		2		3		4	5			
				6						7
		8								
9				10		11				
			12						13	
						14				
16						17				

TIPIEN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S ___ i - (3)
- 9. Nisung telesa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangtiba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Majinü - (5)
- 13. Tzuma nung senzüba - (5)

OLONG PAITEP # 6703 TELANGZÜBA

TIPIEN :

- 2. Bangsemo, 6. Tiptem,
- 8. Jen, 9. Talila, 11. Aren,
- 12. Tzübo, 14. Alia, 16. Angati,
- 17. Odi, 18. Azü,
- 19. Sünglang.

LANGTSÜNGLEN :

- 1. Yipten, 3. Nüja, 4. Sangro,
- 5. Milen, 7. Tulu, 10. Laza,
- 11. Aben, 12. Tiyong,
- 13. Ajizük, 14. Aitsü, 15. Tasa,
- 16. Aina.

NAI-A YA METETTER MA

ALIMA NUNG JENJANG TASAKTIBA GUITAR TI:



Kurt Cobain

- Kurt Cobain indang Martin - \$ 6,010,000
- David Gilmour indang Black Strat - \$ 3,975,000
- Reach out to Asia Stratocaster - \$ 2,700,000
- John Lennon indang Gibson J-160 E acoustic - \$ 2,410,000
- Jimi Hendrix indang Stratocaster - \$ 2,000,000
- PeterGreen and Gary Moore indang Les Paul - \$ 2,000,000
- Jerry Garcia indang Wolf - \$ 1,900,000
- Bob Marley indang Washburn - \$ 1,200,000

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

Manipur: ITLF-i mapai maotsü atema ayongzükba aginogo

Imphal, Tsüklai/February 20 (Agencies): Police head constable ka video ka nung prangbong bener aliba nisung kar den ngushiba ajanga mapai nungi anentsüba sülen Manipur nung tribal lokti tentet kati sorkar tenzükertem mapai maotsü asoshi ayongzükba aliba aginogo.

Indigenous Tribal Leaders Forum (ITLF)-i sangdong ka ajanga, "nüburtem tejangraba apir state sorkar office-i maotsü atema tayongzükba agütsür aliba tangsa tang agintsür," ta metetdaksü.

Yashi Manipur kübok Churachandpur aser kidanger Pherzawl district na nung sorkar office tem nung staff tem kanga ajema liasü. ITLF-i staff tem dang mapai maotsü atema ayongzükba sülen iba ya ataloka liasü.

ITLF-isa, district superintendent of police (SP) aser deputy commissioner (DC) na melentsütsü atema takhangba nenshia

metetdaksüogo aser iba den head constable shiba mapai nungi anentsüogo, pa tanaben mapai anioktsü atema takhangba ka agütsüogo.

Kasa sangdong ajanga ashiba agi, SP aser DC na tekümzükba kübok toktsütsü atema tetuyuba agüjaka tena district-i meyipa aruogo.

Maneni ITLF-i, Churachandpur district nung February 15 nü sorkar ki ka nung mangatettep adokba atema kanga sasasete bilemba lemsatepogo aser ashiba agi, iba lendong ya parnoki memeteti ataloka liasü.

Parnokisa nüburtem dang tarutsü nungbo iba amala tatalokba nung shilem magitsü mepeshia metetdaksüba den shirnokisa tashi mangalir parnok anema jenjang tapet agitsü ta tekümdangtsü metetdaksüogo.

Head constable Siamlalpaul, shiba video ka nung prangbong bena alirtem aser yimtsüng nung volunteer tem den külemi tangoka liasü, pa mapai nungi

anentsüba sülen mepetmesü tulu adok.

Pa mapai nungi suspend sütsüba sülen Siamlalpaul dang station nung dang alitsü atema tetuyuba agütsü aser pa station toktsür aotsü memelaba den pa indang itasen aser allowances sota liasü.

Manipur chief minister N Biren Singh-i iba tatalokba ya aitsüogo aser ashiba agi, SP tepsettsü amokmerenba atema nisung ka aitsüogo aser DC bungalow raksar aliba-a yanglushi tenzükogo.

Paisa, iba mepetmesü adokdaksüba nükjiding kechi liasü ta asüngdangba den, miim onük kar alitsü südi ta ashi aser sorkar record tem kümzükba toktsütsü ta tenangzükba agütsüogo.

Iba den bendenloksema Manipur sorkari iba tatalokba indang tali jangjatsü atema magisterial bushisüngdang ka tenzükogo aser anogo 30 tsüngda osang kabo agütsütsü imlar.

Pare Project atema tangalen nungi engineer tem shimba nüburtemi anemer

Guwahati, Tsüklai/February 20 (Agencies): Pare Hydro Electricpower Project (PHEP) kübok power aser engineering department nung Arunachal nung masü saka tanga junior engineer ana shimba atema Arunachal nungertem mepelar. Pare Project Land Affected Welfare Committee (PPLAWC)-i tangar engineer ana shimba atema tashishiba agütsüogo.

Committee-i iba jenjang agiba atema temulung masüba lemsatepogo aser national

osang kakettem nung mapai tazüng aliba indang advertisement peria magütsüba aser iba project agi kongshir aliba lokti den sensaksem peria makba atema sasasete bilemba lemsatepogo.

Maneni PPLAWC-i, state adena orr tanga tesem nungi nüburtem shimba ashishioigo aser ashiba agi, state nung engineering renemer mapai mongui alirtem aika lir.

NEEPCO-i iba telemtetba agiba ajanga Arunachal Pradesh nung tribal tem kanga

mepeladaksür. PPLAWC-i ashiba agi, iba amala jenjang agiba ajanga nüburtem kanga tezüdangdaksür, shirnok parnok lima nung kecha tongtibang masü ama bilemdaksür.

Pare Hydroelectric Power Project, koba 2019 küm tenzük, iba ajanga state energy strategy nung alizüng tasen ka tongtetdaksüogo, ajisüaka tang mapai nung tangar shimokba ajanga mepetmesü adokba sülen project tejakleni aotsü aliba amokbangtsü amokmerendar.

Manipur Police-i gari auyar ana apu



Imphal, Tsüklai/February 20 (Agencies): Manipur police-i, Imphal West district kübok Regional Institute of Medical Sciences (RIMS) hospital campus nung gari auyar ana gari auyatsü meranga lia puogo, ta police-i Mongolbarnü sangdong ka ajanga metetdaksü.

Itangitertem nungi osang tejangja ka angazükba sülen Imphal West District police

team kati Hombarnü 11 ako meta RIMS campus nung maita aoba sentong ka ayongzükba liasü.

Jelia renemer aliba ajanga police temi gari ayuarthem ya puteta liasü.

Gari auyar ana ya Chongtham Nungei, Thoubal district nungi Ajjur Rahaman (43) aser kasa district kübok Lilong Ataokhong Mamang Leikai nungi Md.

Quyamuddin (31) ta jangjaogo.

Tena ya RIMS Campus nungi two-wheeler gari ka auyar aotsü meranga lia apu.

Auersang ana mener aruba auto-rickshaw ka, mobile phone ana aser master key ka tena ket nungi ngutetogo.

Iba dak sendakba nung ken o ka benokogo aser bushisüngdang tenzükogo, ta police-isa metetdaksü.

Ukraine PM-i Russia den raratsü long-range missiles meshir

Tokyo, Tsüklai/February 20 (Agencies): Russian sepaitem aridoktsü atema Ukraine-i long-range missiles aser danga ammunition nungdaker, ta Ato Kilonser Denys Shmyhal-i ashi.

Tesem kar nung tongpang nung tamakok ajurua aser bendangeri yariba ajema akumba mapang iba sangdong ya agütsü.

Mongulbarnü Japan semdangba mapang, Ukraine nung modern equipment aser training agir aliba sepaitem lir aser NATO standards nung rarar, saka front line nung Russia nunger anema air defence asoshi long-range missiles tali nungdaker, ta Shmyhal-i ashi.

"Tia maka tang anüing nung parnoki akoker aser tia maka iba ya ajanga front line nung timtem kar ajurur, saka Ukraine nem mitkar indang hadir agütsütsü asoshi tembar linük temi nungnanga mali," ta pai ashi.

Injang-bomb agi anüingba aser nübu ajema aliba ajanga tongpang nung Ukraine takoksa tulu ajuruba mapang ka nung Shmyhal-i iba o ya ashi.

Deobarnü Russian sepaitemi Avdiivka yimti agiogo, koba industrial Donbas region leni aoba tesem tongtipang ka lir, aser taoba küm May ita Bakmut agidaktsüba sülen ibai takok tulutiba alitsü.

Ajisüaka anüolen linük temi yariba ajema akumer aser Washington nunga ozüing yanglurtemi Kyiv atema military aid package agütsütsü atema

atsüteper. Republican-i amokbanga aliba House of Representatives nung sen billion \$95 jenjang teyari agütsütsü agizükra Tir Joe Biden-i long-range ballistic missiles dena agütsütsü bilemer, ta US nung osangtem ajanga ashir.

United States-i tang tashinung yoka aliba medium-range missiles den medemdangra item nok-nü ya meta talangba. Item yagi Ukraine-i Russia kübok aliba Crimean Peninsula telung nung kongshitsü.

Tang tashinung US-i Ukraine nem sen billion \$111 shi jenjang teyari agüja lir aser yangji timba nok-nü, osetsüset aser nüburtem nem teyari dena lir. "Taküm tatsüka lir Ukraine-i F-16 fighter jets amshi tenzükerbo tongpang nung tensa aziüktsü aser onok atema kanga tezüpaba akumtsü," ta Shmyhal-i ashi.

Ajisüaka tang long-range artillery aser missiles osettem agi anünger asünung, aji anendaktsüra mesüra menura, onok asoshi tongpang nung lendong tulutibaji aji asütsü.

Sweden-i Ukraine nem sen million \$682 jenjang military oset agütsütsü ta Mongulbarnü ashi.

"Onoki maneni Ukraine yariba kuli ya humanity aser decency mechi lir. Russia-i ozüing alema par sasa rara tenzü," ta Defence Minister Pal Jonson-i osangbener senden ka nung ashi.

Shmyhal ya Japan Ato Kilonser Fumio Kishida ajurutsü atema Tokyo nung liasü kechiaser Japan-i Ukraine yaritsü alima dang ayongzüker aser tang Gaza nung raraba ajanga alimai Ukraine rara senzüka yutsür.

Japan indang constitution nung hadir tesashi magütsütsü shia aliba yong parnoki reconstruction aid nung rangloker.

Rongsenketzüing aintsüba nung rangloker mungdang ka Hombarnü alidang Kishida-i Ukraine tanaben yanglushitsü atema mapang talangka yaritsü nangzüka liasü.

Opposition lenir Alexey Navalny asüba sülen Russia nem temerenshi tasen agütsütsü Shmyhal-i ayongzüka liasü.

Arishi küm 47 tain aser Russia Tir Vladimir Putin anemer Navalny ya Hokulbarnü meta tezülen tepuokdak asü. Navalny asüba ajanga linük balala jashiteper aser Biden densema anüolen linüktem nungi lenirtemi Putin tenüing asener.

"Democratic linük ajunga atema onoki democratic values asoshi rarar, ibai democracy ajanga autocracy den raraba lir," ta Shmyhal-i Mongulbarnü Tokyo nung osangbener dang ashi.

European Union lenirtem senden amenba mapang Germany, Lithuania aser Sweden linük temi Moscow nem temerenshi tasen agütsütsü ayongzüka liasü.

Mitkar lenirtemi Guinea nung sorkar anentsüogo



Amara Camara

Conakry, Tsüklai/February 20 (Agencies): Guinea nung küm ana tejakdang yimten tashi rakzüka mitkar temi interim government anentsüogo aser administration tasen shimtsü ta ashi.

Hombarnü menur mitkar lenirtemi video ka ajanga sangdongba nung sorkar tasen ka mekumtet tashi directors of cabinet, secretary generals aser parnok indang deputy temi bena atatsü. Iba sorkar yagi July 2022 nungi yimsü süa aru.

Meimlai aliba osang sangdongba video nungya presidency indang secretary-general Amara Camara ya müketa mitkar ketdangsürtem aser prangbong bener mask agir sepai kar liasü.

Iba sorkar ya kechi ajanga anentsüar Camara-i mashi aser linük nung koma kongshitsü mesüra sorkar tasenba nung züingsem shirnok asüjar mejangja.

Guinea nung democratic yimya nung mezüing tir shimtetsang Alpha Conde ya mitkar temi 2021 küm September ita atsüingdoka liasü.

Linük balalai ajungshiba mechi mitkar lenir Colonel Mamady Doumbouya-i 2024 küm tatem tashinung elected civilian nem sorkar tashi amoktsütsü nangzüker.

Mangatettep agi sünger Conde-i kümsük tasembuba tir inyaktsü asoshi 2020 küm merangba sülen Guinea nung special forces temi yimten yimsüsüba tashi atsüingdoka liasü.

Iba linük nung nisung kati tir ama kümsük ana tashi dang inyaktsü renema lir, saka Conde-i March 2020 nung constitution tasen ka yanglua pa kümsük tasembuba atema election agiba nung takok ngua liasü.

Conde kümsük tasembuba tir inyaktsü memulunger temi longkak aita security forces den raratepba mapang nisung aika asü.

Iba mapang sorkari opposition züingsem tejangja aika apu aser parnoki rongrong adokdaksü aser azüdokshi tenzükdaktsü ta tai tonglokja liasü.

Iba region nung rongsenketzüing aser yimtenren tsütsü bloc tulutiba Economic Community of West African States (ECOWAS) ajanga mitkartem dang election agia civilian nem tanaben yimsü südaktsütsü ajungshia arur.

2022 küm October ita Guinea nung aliba mitkar lenirtem aser ECOWAS tsüingta tezüingzüktep ka agiba nung civilian nem ita 24 tsüingta sorkar agütsütsü renema liasü.

US-i Israel-Gaza rara khen anena atatsü akhanger



Lebanon south tsütsü tzükum nung aliba Ghazieh jila nung Israel-i amakba ajanga industrial district nungi mokozü tanak adokba jakdang highway nung nisung nokdaktepa aliba angur. Israel-i iba tesem nung tayimtsü amshia amakba sülen nüburtem aoksatep aser ki o jen aika raksatsü.

New York, Tsüklai/February 20 (Agencies): Gaza nung khen atema ceasefire alitsü asoshi United States-i UN Security Council nung draft resolution ka benoka liasü. Parnokisa Israel dang nisung jenti aliba Rafah yimti mamaktsü ashi. UN nung taoba mapang rara indang vote agitepdang US-i "ceasefire" ojang ya mamshi aru, saka Tir Joe Biden-ia kasaji ashi. Ajisüaka Algeria nungi benokba draft resolution ka US-

i nokdangtsü sentong lir, kong tangsa humanitarian ceasefire alitsüla ta shia lir.

Palestine nunger million ka dak tema pei ki yutsür tesem balala nung jenoka lir aser aji Gaza nütsüing yongsük tesadang ka shi lir, aser parnok ya Rafah nung jenoka lir.

Gaza south tsütsü iba yimti ya Egypt den arütsüa lir aser rara metenzükdang iba yimti nung nisung 250,000 dang liasü.

Nisung aika khen atema yangluba süki nung jenoka lir

aser parnok ta tajemtsü tzü aser chiyongtsü agi kanga anünga timtemer.

Israel-i iba yimti amaktsü sentong yanglua aliba ama inyakra nisung ajunga tepsetmatsü, ta UN-ia tekumdangtsü shia lir.

Hamas teloko October 7 nü Israel south tsütsü amakdang nisung 1,200 shi tepset aser 240 dak tema pua bener ao. Iba yongji Israel-i tayang kepzüka Gaza tesem ajungalen amai makyonga arudang nisung 29,000 tepsetogo, ta Hamas meyong health ministry ajanga ashir.

Alimai Washington dang par tashi amshia Israel-i Gaza amakba anendaktsütsü ajungshia arur, saka mapang talangba parnoki par tembar bhu ang kuma aru.

US-i benokba ken o ya tan hopta jembi tenzüksü saka kodang nungi tenzüksü mesüra vote agiteptsü asü masüar mejangja.

Gaza nung khen atema ceasefire alitsü US-i UN nung benokba tang ya mezüingbuba alitsü, kechiaser taoba mapang iba ojang amshibatem nokdanga liasü.

US-i dang yanglua aliba pangzüing nungya Israel-i Rafah makra civilian tem tali akoksatsü aser kidanger linüktemi densema tali prokshitsü ta shia lir. Iba ama maparen yagi region nung yimjung aser tesunep nung kanga sashia kongshitsü ta ashir.

Taoba hopta Tir Joe Biden-i Israel Ato Kilonser Benjamin Netanyahu den sensaksem dang Gaza nung tekeratiba nung ceasefire alitsü ashiba ama iba draft resolution nungya akok tashi tekeraba nung khen asoshi Gaza nung ceasefire alitsü shia lir.

Ajisüaka Netanyahu-i memulunger aser tang tashi pua alirtem kumzüka Gaza ajunga nung Hamas madak takok angutsü ang nangzüker.

Hamas teloki pua alir ajunga March 10 tashinung mechiokra mitkar temi Rafah amaktsü ta Israel war cabinet züingsem Benny Gantz-i tekumdangtsü shiogo. Iba anogo ya Islam yimsü amangertem lumiba temeshi ita tenzüka anogo lir.

Arab linük temi Security Council tenarong tajak ama malitsüla aser linük balalai ajungshiba ama ceasefire lidaktsütsüla ta ashir.

Napoli-i coach Walter Mazzarri mapa nungi anentsüogo



Walter Mazzarri

Tsüklai/February 20, 2024 (Agencies): Napoli-i Hombarnü coach Walter Mazzarri mapa nungi anentsüogo aser Champions League nung Barcelona den masaya tsüingda anogo ana lia Slovakia nunger coach Francesco Calzona shimogo.

Arishi küm 62 tain Mazzarri ya iba season nung Napoli puri mapa nungi anentsüba tanabuba coach kümogo.

Mazzarri-i coach mapa ya Rudi Garcia ket nungi November ita meelenzük, ajisüaka Napoli pur Serie A

nung tekububa nung lir. "Ni Walter Mazzarri dang kanga pelar, shiba De Laurentiis kibong aser Napoli tembar lir. Club mepetmesü nung aliba mapang pai teyari agütsüogo," ta Napoi kibur Aurelio De Laurentiis-i ashi.

De Laurentiis-isa, season matem tashi coach mapa abentsü atema Calzona shimba metetdaksüogo aser pa lenisüba nung Bodhbar aonung nungi asaya tenzüksü.

"Medemer ka mapa nungi anentsütsü kanga tasak," ta De Laurentiis-i ashi. "Ajisüaka

Naples nung Napoli fan tem nem langka talila kabo agütsütsü atema asadangtsüla. Onoki Francesco Calzona tendangtsü," ta paisa shisem.

Calzona lenisüba nung Slovakia pur 2024 Euro atema qualify süogo saka tang Napoli achaayangtsü atema kanga temelaba masütsü. Pa taoba mapang Maurizio Sarri indang assistant liasü aser tang coach ama club-i meyipa aruogo.

Arishi küm 55 tain ya maneni Slovakia coach asütsü aser kasa mapang nung pai Napoli asüingsashitsütsü merangtsü.

Napoli pur tang temaba jenjang nung aliba Inter Milan dang nungi point 27 agi tesülen lir. Mazzarri-i mapa agizükba sülen parnoki league asaya 12 nung pezü dang koka point 15 ngua lir.

Napoli pur taruba season Champions League nung asayatsü atema kangabo timla mali, kechiyong parnok jenjang pezübuba nung aliba Atlanta aser pongububa nung aliba Bologna dang nungi point teku agi tajemba lir.

IPL March 22 nü nungi tenzüksü: Arun Dhumal

New Delhi, Tsüklai/February 20 (Agencies): Kanga dang yongya aliba Indian Premier League (IPL) March 22 nü tenzüksü, ta league mendenbuba Arun Dhumal-i Mongolbarnü metetdaksü.

Linük nung general election agitsü liaka asayamung ya India nung dang asayatsü. 17buba IPL atema mapanglem ya election agitsü aliba ajanga ano mesangdongi lir, koba April aser May nung agitsü imlar.

Dhumal-i ashiba agi, mezüingbuba anogo 15 atema mapanglem sangdonga atatsü aser tanungba asayatem ya election agitsü atema anogo sangdongba sülenang telemtetba agitsü.

"Asayamung March 22 nü nungi tenzüksü asatopard. Onok sorkar agency balala den sendaktepa inyakdar aser onoki mezüingbuba mapanglem ka sangdongtsü. Asayamung ajunga India nung dang asayatsü," ta Dhumal-i PTI dang ashi.

"Lok Sabha election atema anogo taruba ita tetenzüklen sangdongtsü imlar," ta Dhumal-i ashi.

IPL ya 2009 küm dang South Africa nung asaya liasü. 2014 küm election aliba ajanga asayamung shilem ka UAE nung asaya. Ajisüaka 2019 kümbo election liaka India nung dang asaya liasü.

IPL final ya T20 World Cup

metenzük tsüingda May 26 nü asayatsü imlar. World Cup nung India team mezüingbuba Ireland den New York nung June 5 nü asayatsü.

Taküm World Cup ya June 1 nü USA aser Canada na asaya-a tenzüksü. IPL ya teti ama taoba küm final tonga asayaba team ana asayatsü, koba Chennai Super Kings aser Gujarat Titans na asütsü.

Taküm IPL atema asayatem auction December ita agiogo aser asayatem rongnung Australia nunger pacer Mitchell Starc ya IPL puti otsü nung sen tasaktiba agi alizükba asayar kümogo. Pa Kolkata Knight Riders puri sen crore 24.75 agi alizüka liasü.



Kohima nung Kheho India University Games 2023 ayongzüka asayatsü lia aser yimti arakzüdaksütsü aser I.G stadium Kohima nung February 22 nungi 26 tashi wrestling asayatsü aliba dak sendakba nung tangazükba agütsütsü atema February 20 nü Merima nungi Thizama yimtsüng tashi Mascot tour ka ayongzüka agiogo. Maneni February 21 nü Mascot Tour ya Kohima yimti kübok tesem balala nung ayongzüka agitsü.

World TT C'ships: India tetsür team knockouts phase-i iogo

Tsüklai/February 20, 2024 (Agencies): Word Table Tennis Team Championships nung Mongolbarnü India tetsür team-i 3-2 agi Spain koka knock-out phase tongtetogo.

Sreeja Akula aser Manika Batra nati mezüingbuba kija asaya ana makokba sülen India team-i meyipa arur iba asaya 3-2 agi koka liasü.

Tasembuba kija asaya Ayhika Mukherjee-i akokba sülen Manika aser Sreeja nati pezübuba aser pongububa kija asaya koka parnoki asaya akok.

Group 1 nung India team-i asaya pezü nung asem akokba sülen China sülen parnok tanabuba jenjang nung liasü. Parnoki China team dang mekoki liasü. China den asayaba mapang Ayhika aser Sreeja nati world number one aser two, Sun Yinghsa o Wang Yidi na

akok saka tanungba asaya asem mekokteti liasü.

Iba asayamung nung India team quarterfinal tonga asayatetra parnok Paris Olympics team event atema qualify asütsü. Quarter atongtsü atema India team-i round of 32 aser round of 16 nung takok angutsü nungdaker.

Mongolbarnü mezüingbuba kija asaya nung Sreeja-i 9-11, 11-9, 11-13, 4-11 agi Maria Xiao makok aser Sofia-Xuan Zhang-i 13-11,6-11,8-11,11-9,11-7 agi Manika koka Spain team 2-0 agi tejakdang aküm.

Tasembuba jika asaya nung Ayhika-i Elvira Rad 11-8, 11-13, 11-8, 9-11, 11-4 agi akok aser iba sülen Manika-i 11-9, 11-2, 11-4 agi Maria koka 2-2 aküm aser tatemsa Sreeja-i 11-6, 11-13, 11-6, 11-3 agi Sofia-Xuan koka parnoki asaya kokogo.

Germany nunger asayartejen Andreas Brehme süogo

Tsüklai/February 20, 2023 (Agencies): FIFA World Cup koker aliba asayar Andreas Brehme arishi küm 63buba nung süogo, ta pa taoba mapang asaya aliba club Kaiserslautern-i Mongolbarnü metetdaksü.

Brehme indang partner Susanne Schaefer-ia pa asüba osang ya Germany indang dpa news agency nem Mongolbarnü metetdaksüogo. Schaefer-i ashiba agi, Brehme ya temulungjang mapa minyaki akümba sülen mimlai lia ajungbena dang süatok.

1990 küm Germany team-i FIFA World Cup akokba mapang final asaya nung Andreas-i penalty ka idakja parnoki Diego Maradona-i aniba Argentina team goal 1-0 agi koka liasü.

Andreas ya attacking full-back aser dead-ball specialist ka liasü aser final asaya nung pai iba goal idaktsüba sülen pa Germany football legend ka aküm.

"Andreas Brehme asüba osang angazüka FCK-i mang ayimer. Pai Red Devils' tola semer küm 10 tashi asayaogo aser pa FCK nungi asayaba mapang German champion and German Cup akokba asayar aküm," ta Kaiserslautern-i ashi.

"1990 küm pai World Cup final nung penalty ka idakja German national team takok dangi ani aser football legend ka aküm. FCK kibongi mang ayimer aser mangyim jashi tia nung aliba mapang onoki Andi'er kibong aser medemertem bilemteter," ta kasa sangdong ajanga metetdaksü.

Brehme asaya aliba mapang Bayern Munich aser Inter Milan nungia asayaogo aser pa 1998 küm asaya nungi anena liasü. Pa Germany team nungi 86 ben asaya aser iba mapang goal ti idakja liasü, kong World Cup nung kanga dang tongtibang goal ka idaktsüba densema lir.

INDIA OSANG : Tapak 3 nungi...

JP Nadda aser Sonia Gandhi na densema aika...

Tang Rajasthan assembly nung Congress züngsem 70 aser BJP züngsem 115 lir. Iba state nung Rajya Sabha menden 10 lir, aser menden ter nungjagi Congress MP trok aser BJP MP pezü lir.

Maneni Odisha nunga BJP candidate aser Union Minister Ashwini Vaishnaw den BJD nungi candidate ana-Debashish Samantray aser Subhashish Khuntia nunger den tetokteper malibayong par asemprong Rajya Sabha nung shimogo. Mongolbar nikongdang nomination agienba tembangba sülen Returning Officer

Abanikanta Patnaik-i par asem Rajya Sabha nung shimba sangdong.

Odisha assembly nung BJD züngsem peria lir, anungji parnoki Rajya Sabha menden asemprongla nungji takok nguteta dang liasü, ajisüaka BJD-i candidate ana dang toktepdaksütsü aser menden kabo BJP candidate, Vaishnaw nem yutsütsü telemtetba agia liasü.

Odisha nung Naveen Patnaik-i aniba BJD-i state nung railways aser telecom terenlok atema BJP candidate aser Union Minister Vaishnaw yaritsü sangdonga liasü.

BILEMDANGANG
 "Tashi azüoktsü atema tashi amshiang."